

TE HENEURAA API

NENEIHIA I ROTO I TE PIHA NENEIRAA A TE EKALLESIA A IESU MESIA I TE
FEIA MO'A I TE MAU MAHANA HOPEA NEI.
PAPEETE, TAHITI, I TE MAU AVA'E ATOA.

Te hoo: E 2 farane i te matahiti.

No. 5

Me 1936.

Mat. 30.

A arue i te Fatu, e te mau nunaa e; a arue ia'na e te mau taata atoo na. 2. Hamani maitai rahi to'na ia tatou nei; e te parau mau a te Fatu, e tia ia i te vai maite-raa. A arue i te Fatu. Salamo 117: 1-2.

Na Taata Rav'aa

TE ite nei au i na taata toopiti i te tia noa raa i muri mai i te hoê paruru ia ore raua ia iteahia e tatou. Te hoê o taua na taata nei tei te pae anavai oia, e te tahi o taua na taata nei, tei te tahi pae oia no taua iho â anavai ra. Ta raua ohipa e rave nei i roto i te reira anavai ra, o te rav'aa mai ia i te i'a.

Te taata matamua i parauhia nei, e rave rahi ta'na mau taura e ta'na mau mätäu e te mau huru maa hoi no te faaunaunaraa'tu i ta'na mau mätäu. Ia tuu mai ra oia i ta'na mau mätäu i maahia e te maa faaunauna e te anaana hoi, e amu ihoa te tahi mau i'a i taua mau mätäu ra. I te taime e amu ai te i'a i te mätäu e mau ihoâ ratou e aita e ravea ia

mahiti. E huri ĩa te taata ravaai ia ratou i roto i ta'na ete, e na roto i ta'na mau mātāu i maahia e te maa faaunauna, e te anaana hoi, e rave rahi te huru i'a e riro mai ia'na.

Te piti o taua na taata nei, hoê noa iho ana taura e hoê noa iho hoi ana mātāu. Area ra, te riro nei te hoê noa iho huru i'a ia'na; teie huru i'a e mea araara to'na na mata e e mea mâ hoi to'na aau. Ia amu atu te i'a i ta'na mātāu e tamata teie taata i te i'a ia ite oia e, ua mau anei; e mai te mea ua mau maitai, e huri ihoâ oia ia'na i roto i ta'na ete.

O teie ra te auraa o te mau mea i parauhia nei:

Te na taata ravaai ra o *Satane* ĩa te hoê, e o *Iesu* ĩa te tahi. Te anavai ra o te ao nei ĩa, e te paruru, o te mau mea hohonu o teie nei ao. Te mau taura e te mau mātāu ta raua e rave nei, o te mau ravea ĩa no te umeraa mai te i'a, oia hoi te taata ia raua. Te maa i ravehia e *Satane* ra, o te mau mea ĩa o teie nei ao; te maa a *Iesu* o te *Evanelia* ĩa; te ete a *Satane* o *Hade* ĩa e te ete a *Iesu* ra, o te *Ra'i* ĩa.

E rave rahi te huru taata ta *Satane* e roaa nei, area ta *Iesu* e roaa nei, hoê noa iho ĩa huru. *E mea maitai ratou.*

A faaroo atu tatou atoa nei i te *Parau Mo'a* ia a'o hia mai ia tatou nei, ia ore tatou ia riro ia vetahi ê.

Papathia e Rui Crometua.

A arue i te *Fatu*; e mea maitai te himene ei arue i to tatou *Atua*, e mea poupou ĩa; e mea au hoi te arue. 2. O te *Fatu* te patu faahou ia *Ierusalem*a, e na'na e haaputupu i to *Iseraela* i purara ê ra. 7. Te tauturu nei te *Fatu* i tei hachaa ra, te huri nei râ i te paletu ore i raro i te repo. *Salamo 147: 1, 2, 7.*

Te Tumu no te Buka a Moromona.

TE tumu rahi i horoahia mai ai te Buka a Moromona i to te ao nei i teie mau mahana hopea nei, ua faaitiehia ia i roto i te Omuarāa parau, o mua ia i taua buka ra, e na papaihia te reira e Moroni e tei na ô mai: *E ia faaite papu atu hoi i te ati Iuda e te Etene atoa hoi e, o Iesu, o te Mesia ia, te Atua Mure ore, o te faaite ia'na iho i te mau fenua atoa ra.* Oia hoi, ia faaapihia to tatou faaroo ia Iesu, e ia rahi atu to tatou ite e to tatou faaroo ia'na ra. O te tumu rahi ia i horoahia mai ai te Buka a Moromona ia tatou nei.

I teie mau mahana nei te mo'e nei te reira mau mea, te ite e te faaroo ia Iesu, i te mau taata e rave rahi o tei ore i farii i te tahi vahi i roto i te Bibilia. Ua faaitiehia te reira na roto te hoê parau uirāa tei haponohia i te mau Orometua e pae hanere no te hoê Ekalesia rahi.

Te hoê uirāa tei uihia ia ratou ra, o teie ia: *Ua faaroo anei outou e, e Atua mau o Iesu?* No roto mai i taua pūpū taata e pae hanere ra, ua pahono mai e hoê hanere e e toru ahuru taata e, *Aita!*

Na teie e faaite mai ia tatou e, aita i navai te mau parau i roto i te Bibilia, i nia ia Iesu, ia haapapu i te mau taata atoa i to'na huru mau, no te mea, e rave rahi te mau taata i roto teie nei ao ma te faaroo ia Iesu mai taua mau Orometua e hoê hanere e e toru ahuru ra.

No reira, mai te mea te mo'e nei te faaroo o te mau taata i roto ia Iesu, e mea tia roa ia ia horoahia mai te tahi mea ei haapapu ia tatou i to Iesu huru mau, e ia faatupu faahou i to tatou faaroo ia'na. Ua na reira hia ia i teie mau mahana hopea nei, ua horoahia mai ia tatou te hoê ite no Iesu, oia hoi, te Buka o Moromona.

HISTORIAN'S OFFICE

Church of Jesus Christ of Latter-day Saints

47 East South Temple St.

SALT LAKE CITY, UTAH

Ua faaitehia i roto i taua buka ra te huru no to Iesu parahiraa i rotopu i te tahi feia no'na ra, ta'na mau haapiiraa ia ratou, e te mau ohipa atoa ta'na i rave a parahi ai oia i rotopu ia ratou, e na te reira e haapapu ia tatou i to'na huru mau.

E hi'o tatou atoa e, e parau mau anei te mau parau tei faaitehia i roto i taua buka ra, e mai te mea e oia mau, e tai'o tatou i te reira e e haapao tatou i te parau i faaitehia e Moroni i roto i te buka Moroni, pene 10, e te irava 4 e te 5. *E o teie ta'u a'o ia outou na, ia itea teie nei mau parau ia outou, e ui atu i te Atua, i te Metua mure ore, i te i'oa o Iesu Mesia e, e parau mau anei teie mau parau e aore anei: e ia ui atu outou ma te faaroo i te Mesia, na'na ia e faaite mai i te parau mau ia outou na: E na roto i te mana o te Varua Maitai e ite ai outou i te parau mau i te mau mea atoa ra.*

E hoê hanere e ono matahiti i teie nei mai te neneiraahia o te Buka a Moromona. Ua iritihia taua buka ra i roto i te mau reo êê e hoê ahuru e ma ono. E rave rahi te mau taa-ta i te ao atoa nei tei tai'o i taua buka ra e tei haapao i te parau a Moroni, e ua riro ratou ei feia faaroo papu roa i te Mesia ra.

Ua faaitehia te faaroo rahi no te feia matamua tei farii i taua buka ra, na roto i to ratou vaiihoraa i to ratou mau fare e te mau mea atoa na ratou e to ratou haereraa e hoê tauatini maile e tiahapa na te medebara i te imiraa i te hoê vahi maitai no te haamoriraa i te Atua, e te mau faainoraa tei tuuhia i nia iho ia ratou i taua mau taime ra e tei faaaromaihia e ratou ra.

Papahia e Iosepha O'ometua.

TE AROHA RAHI

TE tahi anotau i mairi a'enei te parahira te hoê utua-fare i te fenua ra i Amerika; i roto i tana utuafare te vai ra e tootoru taata. I te hoê mahana ua pohe te metua vahine e ua faaite te metua tane i ta'na tamaiti, oia hoi e, na oe iho e imi i ta oe iho maa, e i muri mai i te reira ua pohe atoa te metua tane.

Teie tamaiti o *Timi* to'na i'oa e e hoê ahuru noa iho to'na matahiti, noa'tu ra i te reira, e tamaiti mātā'u ore oia, no reira ua haere ihora oia e imi i te ohipa. Ua pau e maha mahana na mua i te roaaraa ia'na te hoê ohipa, oia hoi, te hoo-raa i te ve'a na nia i te purumu.

I te hoê mahana i muri mai ua ite oia i te hoê taata, tei hoo mai i te ve'a e ta'na vahine e ta raua tamahine nainai i pihaiiho ia raua, e i muri iho i to'na hooraa i ta'na ve'a ua haamata ihora ratou i te haereraa i te tahi pae atu o te purumu, area râ ua ite raua, oia hoi, te metua tane e te metua vahine e eita e nehenehe ia haere faahou â no te mau pereoo uira, no reira ua faaea ihora raua, area râ ua haere noa'tu â te tamahine. Ua ite o *Timi* i te reira e ua horo ihora oia e tapapa ia'na: ua manuia oia e ua turai oia i te tamahine e ua ū mai te pereoo uira i nia ia'na, area ra ua ora te tamahine. Na na metua o te tamahine i afai atu ia'na i te fare ma'i ia rapaauhia oia.

Ua pau e hitu mahana hou to'na araraa, e i te araararaa to'na mata ua ite oia i te hoê piha nehenehe roa, te ro'i uo-uo maitai e i te vahine utuutu nehenehe e te metua vahine e ta'na tane e te tamahine atoa hoi. E mea maere roa teie ia-na e aita oia i faaroo i te reira, ua mana'o ihora oia e, tei te ra'i oia. Ua haafatata atura te metua tane i pihaiiho ia'na e

ua na ô atura ia'na: *E Timi e, ua hinaaro anei oe i te haere mai i to matou fare e e parahi i pihaiho ia matou?* No te rahi o to'na ta'i aita i tia ia Timi ia parau maitai, area ra ua parau moi oia *E*.

Ia horoa te taata i to'na iho ora no to'na ra mau taua, aita roa e taata aroha ê atu i tei reira. *Ioane 15:13.*

Papahia e Tihoti Orometua:

E RATA NA TE MAU OROMETUA TAHITO.

Roto Miti te 4 no Eperera 1936.

Na te mau Taeae e te mau Tuahine i te mau fenua moana ra.

Ia ora na outou na roto i te aroha o to tatou Fatu o Iesu Mesia ra.

E homa, ua farii matou i ta outou rata ra, e ua mau-ruuru roa matou no te reira. Ua tai'ohia hoi ta outou rata i ta matou Amuiraa Eperera no te mau Orometua no Tahiti tei ho'i mai. Ua rahi hoi to matou oaoa i te tai'oraa i te mau parau e te mau i'oa i papahia i raro ra.

I roto i teie Amuiraa ua himene hoi matou i te mau himene Tahiti e ua parau matou i roto i te parau Tahiti. Aue hoi te aroha e te oaoa tei tupu i rotopu ia matou no to matou mau hoa, oia hoi, o outou ra.

Tei rotopu ia matou na Orometua apî e piti te reva'tu ananahi i to outou fenua ra. Na raua e afai atu i teie rata ia outou. Na raua e afai atoa'tu i to matou aroha ia outou na.

E mea rahi roa te mau taata tei haere mai i te Amuiraa Eperera i Roto Miti nei. No te mau fenua e ati noa e ratou tei haere mai e faaroo i te mau parau a to tatou Peropheta o Hebera GARANATA e ta te tahi mau Aposetolo.

E mea ati roa e e mea huru ê te mau mea e tupu nei i nia iho i te ao nei, e mai te mea ra e faaroo tatou e e haapao tatou i te parau a te Atua, Na'na e haamaitai e e paruru mai ia tatou nei.

Te faaoti nei matou i teie parau poto ma te aroha rahi e te aniraa i te mau haamaitairaa no te Atua i nia iho ia outou na.

Papahia e to outou mau hoa, oia hoi, te mau Orometua tahito tei tae mai.

Tihoti Tanona e Eugene Tanona. Aneterea Setamana.

Alama e Ruita. Ereneta Rositera.

Samuela a Dimona. Ioane Orotana.

Roroma. Matara.

Materita e Tihoti. Lito.

Elita. Tihoti Fowers. Ira Hyer. Viliamu Tonovera.

Etuana.

TO'U MATAITAIRAA

I ROTO MITI

TE tufaa fenua i te tooa o te râ o te fenua Amerika apatoerau, tei faarirohia ei tufaa no te Hau Amerika i te matahiti 1847, e te Feia Mo'a no te Mau Mahana Hopea Nei, ua mataitaihia a'enei e te mau taata, ua rave ra-

rahi te tauatini, e tei faaite i te mau mea atoa ta ratou i ite e te huru mau o te Feia Mo'a no te Mau Mahana hopea nei.

I rotopu i teie mau taata ua varavara paha te taata tei farii i te faaroo *Momoni*, mai tei parau noa hia nei, tei haere i te fenua o te *Momoni* ia farerei haere i te mau taane i reira e e parahi rii i rotopu ia ratou.

Ua noaa a'enei te reira ravea ia'u e e tia ia'u ia paran e, e haamaitairaa te reira na te Atua. Mai te taime i noaa'i ia'u te ite o te evanelia na roto i te mau haapiiraa a te mau Orometua no te Ekalesia a Iesu Mesia i te Feia Mo'a i te mau Mahana Hopea Nei e to'u fariiraa i te bapetizoraa, ua opua vau i te haere i te fenua ra i Utaha,—o te i'oa ia o te fenua i faatiahia e te *Momoni*,—ia ite mata vau i te semeio i ravehia e te Atua, ia ite mau vau i te huru o to'u mau taee marite e inaha, ia noaa mai ia'u, i to'u oraraa nei, te hoê haamana'oraa e te hoê ite te faaitoitoe i to'u nei faaroo rahi.

E mea poto roa to'u parahiraa i rotopu i te mau *Momoni*, ua navai ra te reira ia'u no te iteraa i to ratou huru mau e ia ite atoa e, aita'tu vahi e itehia'i te feia hau mai ia ratou, tei au ia rave i te ohipa e tei farii i te iraa o te oaoaraa no te oraraa nei.

E mea fifi ia faahiti i te huru o taua fenua ra ma te tapiti ore i te mau parau a te mau taata papai parau aamu tei haere e mataitai i taua fenua nehenehe ra. I te taime a papai ai au i teie nei mau parau e au e te ite atura vau i taua ra'i moana ra, te mau mou'a tei au rii to ratou huru i te mau mou'a no Provence e te Pyrénées, tana roto rahi ra te faatupu i te feruriraa e te taperaa mahana ura tei puohuhia e te hoê rupehu māmā roa; e haamataraa tau toetoe i te reira taime e ua tapoihia te mau mou'a i te mau raau huru rau. Ia Roto Miti ra, o te oire nehenehe roa a'e i te mau oire atoa ta'u i mataitai i to'u tereraa na Amerika.

E parauhia e semeio te mea te ore e tia ia faaite i to'na huru mau. I ô nei ua rivo te medebara ei vahi faaapuraa, te mau faa maro ei taheraa pape e te vahi ano ua monohia ia e te mau oire rarahi e te mau oire rii; e ere anei te reira i te semeio tei faatupu i te parau ta tatou e haapii nei i roto i te mau Parau Mo'a: *E pee te mou'a i te faaroo?*

I roto i te *Fare Menemene* o Roto Miti te vai nei te hamonia rahi a'e o te ao nei e tei hau atoa i te maitai. Ua noaa ia'u te oaoa rahi i to'u faarooraa i te ta'i o te reira hamonia. Ia haamana'ohia te mau fifi huru rau tei farereihia e te mau taata tei hamani i te reira hamonia e noa'tura i te reira, ua oti maitai ta ratou ohipa e tia ia ia tatou ia haroaroa i te huru o to ratou faaroo. E ere anei te reira i te semeio te tia i te faaroo ia faatupu?

E tia anei ia parau faahou â vau e e feia maitai, te farii aroha mau e te oaoa te mau *Momoni*. Ua fariihia vau, e ratou, ma te aau tae mau e te tapea ore. Ua farerei faahou â vau i te mau taure'are'a e rave rahi ta'u i ite a porohaere ai ratou i te evanelia i Farani; ua hi'opoa maitai au ia ratou e ua ite au e, aita roa to ratou faaroo papu i faahuru ê hia e te mau peapea o te oraraa nei e te vai itoitonoa ra ratou i roto i te mau ohipa o te Ekalesia. E ere anei te ohipa Mitinare i te ohipa mo'a e te hoê ravea maitai no te taviniraa'tu i to'na Atua e te imiraa i te ravea ia ora to'na iho mau taata tupu, mai te faehau te huru, te tavini i to'na Hau ma te haapii atoa i te paruru ia'na ia roohia i te ati?

I te fenua Utaha ua hau roa te haapiiraa i te mau tamarii i te haapaohia e ua mataitai au i te Brigham Young University tei faaterehia e Harris e ua mauruuru roa vau i te reira no te mea e mea tia ia noaa te ite i te taata ia tia ia'na ia hare i mua. Ua faatiahia te Ekalesia, e te peropheta ra o Iosepha Semita, mai te huru e te hoho'a mau o te Ekalesia a te

Mesia iho, no reira e tia i te mau Feia Mo'a atoa ia farii i te Autahu'araa. Na te reira huru faatereraa e faatupu i te ta-hoêraa i roto i te ohipa.

Te mana'o nei te tahi mau taata e, ia hinaaro te hoê ia haapao i to'na faaroo, ia haere noa oia i te mau pureraa e atira. E mana'o hape te reira i to matou feruriraa, no te mea e tia i te mau taata atoa ia haamaitai i te Atua e ia haapao maitai i ta'na mau faaueraa i te mau taima atoa no to'na oraraa. Inaha, te haapao nei te mau *Momoni* i te *Parau Paari* tei he-heuhia mai i te peropheta e tei riro ei aveia no te oraraa maitai. E haapaoraa i roa te haapaoraa *Momoni* no te mea e philosophia ia no teie oraraa.

Mai tei parauhia e Racine: *Te faaroo te ore erave i te ohipa, e faaroo mau anei?* E mea tia ia rave te faaroo i te ohipa; o te tumu ia no te maitai o te mau *Momoni*.

Te mau taata te parau e, aita a'enei e maitai ta te mau haapaoraa faaroo i horoa na te taata, e mea tia ia haere ratou e farerei i te mau *Momoni* ia ite ratou i to ratou hape; i reira ratou e ite ai e, te mau mea tei pau te mau hanere matahiti ia tupu, i te tahi mau fenua, te itehia nei te reira, i reira, i roto i te hoê noa iho hanere matahiti.

O te parau faaite te reira no te parau no te EKALÉSIA A IESU MESIA I TE FEIA MO'A I TE MAU MAHANA HOPEA NEI.

Paris te 14 no Tenuare 1936.

PAPAIHIA E GEORGE P. CLAYET.

Eiaha roa ei taata haavarehia e parau e, Ua haavarehia vau e te Atua, e ore roa hoi te Atua e vare i te ino, e ore roa hoi oia e haavare i te taata. Ua haavarehia râ te taata ia faahahau-ê-hia, e ia riro noa'tu i to'na iho hinaaro tia ore. E ua tō ana'e taua hinaaro tia ore ra, fanau maira ta'na, o te hara; e ia rave-faahope-hia te hara ra, fanau maira ta'na, o te pohe. Eiaha e vare, e au mau taeae here e. Iakobo 1: 13-16.

Te Amuiraa Eperera i Papeete.

INAHA ua oti a'enei ta matou Amuiraa Eperera tei faaterehia i Papeete Tahiti ei haamana'oraa i te hanere e ono raa o te matahiti i faatiahia'i te ELALESIA A IESU MESIA I TE FEIA MO'A I TE MAU MAHANA HOPEA NEI.

Mai te au i te aniraa a te Peretiteni Misioni, o Le Roy MALLORY, ia haaputupu mai te mau Amaa i Papeete nei no te Amuiraa, ua tae mai te Amaa no Takaroa, to Aratika e to ratou mau melo faatere e te mau Peretiteni e te tahi mau melo no te mau Amaa no Takapoto, Vahitahi e no Hikueru. Ua tae mai to te Amaa no Takaroa e Takapoto i te mahana maha te 2 no Eperera i te ahiahi na nia mai i te pahi ra o Denise e ua haere ratou i te fare i faaineinehia no ratou ra, e no to ratou rahi aita ratou i o reira no reira ua imi haerehia te parahiraa no ratou e i te hopea ua noaa te puhaparaa no ratou.

I te po mahana pae ua faatupuhia te hoê apooraa no te faaafaroraa i te mau ohipa no te Amuiraa. Ua putupu mai te Autahu'araa atoa e te mau taeae hoi, e ua faaroorhia te mau mana'o e rave rahi, e i te hopea ua tahoe hia te mau mana'o i nia i to te Peretiteni o Le Roy Mallory tei na o mai: 'E haamatahia te Amuiraa i te mahana maa te 4 no Eperera i te hora 8 i te poipoi na roto i te pureraa Autahu'araa. Ua faaite atoa mai oia i te mau ohipa e ravehia, i roto i te mau pureraa mai te haamataraa e tae noa'tu i te hopea o te Amuiraa.

Ua haamatahia te Amuiraa, i raro a'e i te faatereraa a Le Roy Mallory Peretiteni Misioni, i te 4 no Eperera na roto i te hoê pureraa Autahu'araa. I roto i taua pureraa ra ua faaroorhia te mau reo o te mau feia faatere no te mau Amaa i tae mai, i to ratou faaiteraa mai i te huru o te mau ohipa i ravehia i roto i to ratou mau Amaa i te matahiti i mairi ra. Ua faaite mai o Le Roy Peretiteni i to'na mauruuru rahi i te farerei faahouraa i te mau taeae i roto i teie amuiraa e ua ani oia i te mau Feia Api ia faaitoito i roto i te ohipa a te Atua. I te faaotiraahia o taua pureraa ra ua faaitetia te mau ohipa e ravehia i te avatea oia hoi, te mau pureraa e te haapiiraa hoho'a. I te hora 10 i te avatea e i te hora 2 i te ahiahi ua faaterehia na pureraa a'oraa evanelia e ua faaroorhia i reira te parau a te Atua no roto mai i te vaha o te mau feia api e te mau taata paari tei maitihia ei auvaha parau no te reira mau taime. I taua ahiahi ra, i te hora 7, ua faaterehia e Le Roy Peretiteni i te tahi mau hoho'a cinema tei faaite mai i te mau ohipa tahito tei patuhia i nia i te fenua Amerika tei haapapu e, e parau mau te Buka a Moromona, e te huru no te Ekalesia, mai to'na faatiaraahia e tae roa mai i teie nei mau mahana.

I te 5 no Eperera ua faaterehia te pureraa Autahu'araa i te hora 8 i te poipoi e i te hora 10 te hoê pureraa a'oraa evanelia e i reira ua faaroohia te parau a te Atua na roto mai i te vaha o te mau taata i maitihia ei auvaha. I te hora 12 i te avatea ua haere te Amuiraa i Hamuta, no te raveraa i te oro'a baptizoraa no Tara o Tehiva, e ua tauturuhia ratou e te Varua o te Atua. I te hora 2 i te ahiahi ua faaterehia te pureraa Oro'a no te Amuiraa e i reira ua faaairohia o Tara a Tehiva ei melo no te Ekalesia e ua tuuhia te i'oa o te tahi mau taeae, i mua i te amuiraa, no te fariiraa ia ratou i roto i te mau toro'a i mana'ohia e tuu i nia ia ratou, e ua fariihia ratou e te amuiraa atoa. Ua vai tamau noa te varua o te Atua i roto i te amuiraa e ua rahi roa te parau maitai i faaroohia i taua taime ra no roto mai i te vaha o te mau taeae. I taua ahiahi ra i te hora 7 ua faaterehia te Haapiiraa i roto i te aua i pihaiho i te Fare Orometua, na te Feia Api no Papeete i faatere, e i reira ua mataitahia na hoho'a no na Taleni e Hoê ahuru tei faaterehia e Heia a Mapuhi e te hoho'a no te Ora e te Pohe, tei faaterehia e Le Roy Peretiteni; ua faaroo atoahia te mau himene tarava e te pūpū pū i taua po ra.

I te 6 no Eperera ua faaterehia te pureraa Autahu'araa e te mau pure-raa A'oraa Evanelia. I roto itaua mau pureraa ra ua fariihia te mau melo faatere atoa i roto i to ratou mau toroa faatere na roto i te afairaa i te rima atau i nia e ua faatoroahia te tahi mau tae ei Diakono, ei Haapii e ei Tahu'a. I muri iho ua faaroohia te evanelia a te Fatu na roto mai i te vaha o te mau taeae tei maitihia ei auvaha no te reira taime. Ua faatitihia te Amuiraa na roto i te Haapiiraa hoho'a i faaterehia e te Amaa no Takaroa. I taua po ra ua faaterehia te haapiiraa hoho'a no te Mana no te Faatahi-nuraa e Vahinerii a Maire, te hoha'a atoa no te mau Semeio i ravehia e Iesu, na Tufariua a Taha i faatere. I muri iho ua faatere mai o Tarehu a Painara i te parau no te faatiaraa no te Ekalesia. Ua faaroohia i taua po ra te mau himene guitare no to Papeete, Aratika e to Takaroa, te himene tarava e te pūpū pū no Takaroa.

I te mahana piti i muri iho ua himene te mau pūpū himene no te Ekalesia i te Radio e i te mahana toru ua haere te Ekalesia taatoa i Haapape no te hoê amuraa maa rahi i faaterehia e te mau Orometua e i te mahana mahana ua haere te tahi pae e faaati i Tahiti.

O te huru ia o te mau ohipa i ravehia i roto i teie Amuiraa.

Papahia e Marcel BONNET.

Louis Dröllet Gérant

Le Roy Mallory Imprimeur.

Rue Dumont d'Urville, Orovini, Papeete, Tahiti.